

't Groot Zwols Dictee weer achter de rugge.

27 maart 2015.

Donderdag 26 maart 2015 is in 't HCO an de Van Wevelink(h)ovenstraote 't 15^e Groot Zwols Dictee e-ollen.



Nao 't welkom e-ieten deur Bert de Vries, direkteur van 't (H)Istorisch Centrum Aoveriessel en sins kört ook van de lesselacademie, kreeg Börgemeester Henk Jan Meijer 't woord umme een inleidend prötien te ollen.

Ij wazzen eigen best wel bli'j dät ij disse kere weer an de buurte was umdät 't toch al weer 't derde lustrum van 't Zwols dictee is en ij as burgemeester ze now ook alle drie ef kunnen doen. Börgemeester Meijer begrepen ook dät 't Zwols as taal ook een stukkien eigen identiteit gèf an de stad en 't toch töt een cultereel erfgoed euren. Zelf ef ij niet te völle met 't Zwols as taal, ij is meer van de voetbal, maer 't eurt ter wel bi'j en der is toch wel belangstellink veur. Wöörum döt een mense iets . . . umda-j dät leuk vinnen !



lernao was de beurte an Minke Kraijer. Die ieten netuurlijke eertsens de sponsoren en de anwezige Zwolse prominenten ärtelijk welkom,



lei de spölrègels nog is èven uut en begon dörnao met 't oplèzen van de eertse zinne.

Wi'j gaon der opni'j tègenan met 't skrieven van zinnen wöör be-eurlijk muulijke weurties in veurkommen, soms ook met lèèstèkens der in. Döör wi-k jullie vanaovend graag met verwennen. Met disse zinne is de kop van 't vieftiende dictee derof!

Now dät belooft wat . . . en Minke zeg altied veurof dät z'j 't dit jöör niet te muulijk ef emaaft. Mi'j was 't zweet al uut-e-bröken.

En zo kregen de deelnemers nog een antal zinnen veur de koezen wöörvan a-j die veur 't eerst euren al denken . . . **wöör ef dät mense 't aover?**

Ik mutte dan ook extra mien beste doen umme aer preberen goed te verstaon en make juist döördeur de meeste folten of vergète woorden op te skrieven umdä-k aer bi'j wil olen. Die vergèten weurties mu-j der dan achterof weer tussen zien te knooien as Minke de ele zinne nog een keer ter controle oples.

Nao èven stille te staon bi'j Stichting Abracadabra,



snörkende pärtners en een mobiel tillefeuntien kommen wi'j uutendelijk bi'j de leste zinne . . . ook zo'n onmeugelijk verknupt dink wöör ik absoluut gien snaers van snappen maer wel wat mosse opskrieven

't dragen deur tientallen, dalft de wind in mien rugge

Eerlijk ik kon der met de beste wil van de wereld gien sukela van maken.

Nao een phúú-diepe zucht en vekrampte vingers is 't veurbij en kump de vraoge van Minke . . now . . viel 't met . . . zo muulijk was 't toch niet ?

Veurdät 't naokieken kan beginnen krig eerstens Paul Gellings de gelègeneid een päär gedichies veur te dragen.

Zo euren wi'j, uut zien ni'je bundel **Ingenious**, zien gedachtengank aover 't gemis van 't literaire café **In De Sinnepoppen** en de kastelein.

't Twiede gedicht is een ode an Ron van de Berg . . . **de Openluchtbad Blues**.

De derde giet aover (H)arry Pierik's verbörgen stadstuin . . **terugge naor Eden**.



En dan kump 't . . . wi'j maggen gaon naokieken . . . op 't now nog anraken van de blauwskrievende penne stiet de straffe van uitsluting . . dus alles wat folt is wört in **rood** an-ekruusd.

De eerste zinne . . .



Tja en a-k dan zelf 't **15^e** dictee ebbe op-eskröven betend dät . . . **10** folten ! Oezo de kop is derof ? A-k zo begunne met 't naokieken zo-k aoste de kop laoten angen.

En zo wörstelen wi'j ons deur kiekend, naor de op 't skerm eprojecteerde zinnen, en ons eigen andskrift op een steeds maer rooier wördend pepiertien. Tenslotte de leste zinne . . ie weten wè . . dät dink wöör ik gien snärs van snappen. Wat mos die now wèen ?

Edragen deur twie touwen, douwt de wint in mien rugge, en met 't knärsen van iezer, talter ik naor 't verlèden terugge.

Hier bin-k dus wel be-oorlijk van an 't skommelen ekommen.

't Lèk niet ies op wa-k op-eskröven adde. Dus èven de letters tellen en töt een totaal van **22** folten kommen. Ku-j naogaon dät 't gauw kan oplopen op disse meniere.

Ien dink es wel vaste . . . zo meraekels slecht as vandaege e-k 't dictee nog nooit emaaht.

Zo lankzaemerand e-k toch echt 't idee dät ter een ni'j weurtien in 't Zwols woordenboek mut wörrèn bi'j-eskröven.

Te weten 't woord **MINKEN** En dan bedoelt as een **zwak wärkwoord** :

Dus in tegenwoordige tied : ik minke, ie minkt, ij minkt en wi'j minken.

In de verlèden tied : ik minke(n), ie minken, ij minken en wi'j minken.

Dät zovölle betekend as:

't lukt oe toch nooit umme 't Zwols Dictee foltloos te skrieven !

Nao 't ongeleuvelijke antal van **80** folten op 't uitdaegingsförmeliertien te ebben eskröven (in de ope dät *Jacco de Zwollenaer* dät ook zollen doen), begun Minke te skatten wie der de minste folten zol ebben.

Wie ef der minder dan 20 . . . **gieniene !** . . . minder dan 30 ? . . . **ja allo, wat dach ie der van?** . . . 50 dan? . . . **oeeps!** . . . 80 folten . . . **oera, inies bint ter een kladde annen.**

De förmelieren wieren in-enömmen en de jury kon an-t wärk.



Maer goed dät ter pauze is en wi'j even de kële kunnen smeren veurdät de priesuutrieking kömp.

Utendelijk is de jury der uut en kan de börgemeester de prieswinnaers de bi'jbe-eurende priezen aoverandigen.

Eerstens krèg (H)Ennie Bruggeman die as winnaer van 2014 de **Wieze Oele** weer ef mutten inlèveren, een ölten Pèperbusse met vloeibaare in-old. (in een flesse)

De derde pries giet naor . . . Paul Gellings met *slechts* 94 folten.

De twiede pries göt naor . . . Nel Poel met . . . 93 folten.

Dan de ontkeuping van de aovend:



De eerste pries is veur
Leo Egberts met . . . 92 folten.



Toen dät achter de rugge was, döörven ik ook weer onder de mensen te
kommen, want ik waere maer wat bli'j da-k 't elemaole niet zo slecht ad
edaon as dä-k dagge.

Upsekee . . . met zien allen an de börrel !



(H)Enke Klompemaker mog ons döörbi'j met zien liedties vermaeken.

Èvenlater nog een kleine onderbrèking umdät ter muziek mos wörrèn op-ezögt
wöörnao Minke, samen met Klopenmaker 't ritme van de règen op 't
zolderaampien lieten kletteren.



Zo zie-j maer weer een verrassink kump altied onverwacht.

En zo kreup de aovend lankzaam naor zien ende.



Eelaas ef *Jacco de Zwollenaer* 't antal folten niet op-eskröven en is dus niet op de uitdaegink inegaon, **of ij is ter niet e-west**, dus e-k de flesse Zwolse Whisky maer weer met-nömmen.

uitdaegink :

A-j **Jacco de Zwollenaer** bint of oe deur veur uutgèëft, ma-j strakkies van oew nao-ekèken dictee 't antal folten opskrieven en bij 't Sassenpoortkissien achterlaoten.

Görendrögien zal em der ook achterlaoten.

Görendrögien **80** .. << folten >> Jacco de Zwollenaer



Volgend jöör weer ? ... Ikke wè !

27 Meert 2015

